



наведи телефон

Луимә СЭрипос

28.05.2026
№ 10 (1364)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



Ишхипыт-мат-туйык хури

«Николай Пирогов» ос «Святитель Лука» лёккар нәиңхәпыг Ханты-Мансийск үст нәлув нарыгтавесыг. Төнт округ кўщай Руслан Кухарук ос мөт кўщайт тув ёхталасыт. Лёккарыт мән пәвлытыт блнә мир уральтаңкве минасыт. Хоты пәвлытын тән хбиглэгыт, та урыл 3 лөпсыт ловиньтән.

Ты номер ловиньтән:

Пёс йис накыт ханищтавет ос нәпакн хансавет

▶ 2

Потрыт хаснә мәхум вәрмаль

▶ 4

Ойка стиханә ловиньтән ос мәнъщи ләтңыг толмашлән

▶ 5

Мән сәлыңколт яныгмасүв

▶ 8-9

Нёрт сака пүмащ

▶ 10-11

Тәнки пәвланыл вос эруптыяныл

▶ 12

Олнә мāv янытлаңкве ханищтәв

▶ 15

Пёс йис накыт ханищтавет ос НЭПАКН хансавет

Сосса мэхманув колтагланылт хумус олэгыт, хумус пёс йис олупсан нывраманыл ханищтыяныл, та урыл Ас-угорский институтыт научно-практический семинар вэрыглавес, тох намаим олыс – «Семейно-бытовая обрядность обских угров и лесных ненцев». Янгыщ пуссын пүри вэрнэ урыл манос элумхблас ёл-щёпитан урыл потыртасыт.



Мэхум потырт хўнтлэгыт

Татьяна Молданова, история наукат кандидат нам оцнэ хотпа, лэвыс, пёс порат агирищ мәнэ тагыл ханищтавет, анёкватэн манос щасцёкватэн ёт тотыглавес, савсыр эрнэ тэлал хўлтыглавес. Агирищ ёнгасым аканьлахтас, ханищтахтас щанниг ёмтуңкве. Элумхблас ёл-щёпитан порат ос нэ хотпат янгыщ тән матырати вэрёгыт, хум хотпат ос танти вэрмаяныл вэганыл, ты тэлатын пыгыт ханищтавет.

Светлана Попова, история наукат кандидат нэ, хумус мәнэщи щырыл пүри вэрвес, хумус маньнэ хайталавес, та урыл потре олыс. Мән мәнэщи щырыл лавёв – нэ хум вэрыс, хум нэ тотыс, руц латңыл тай акв холът лэвавэг. Пёс порат хум рўтанэ манос такви нэ сунсыглы, ос

тувыл хайталаңкве та ялэгыт, потыртахтэгыт. Аги щаняге-ацаге те кэсацёг, элал хайталан нак та вэраве.

Хум русың төр ос суп ёт тоты, маньнэ щанён-ащён мўйлупты. Пүри тэнэ порат маньнэ колн хуньтотаве, тав хасап сыйт уңлы, тув тэнутыл миве, тот тэг. Мўй мэхум пасан ватат уңлахолэгыт, потыртэгыт, тэпьялэгыт.



Т.А. Молданова потырты

Доклад-потырт ловиньтаманыл халт «Праздник в деревне Ломбовож» тина суссылтавет. Ты тина 1991 талт послувес, ты кастыл тув мәнэщи павлытныл ос Ханты-Мансийск ўсныл сав мэхум ёхталасыт. Тина вэрнэ магыс мәнэлат хум послахтаңкве кэсащасбг, ты Татьяна Мерова, тав та порат телевиденият рўпитас ос Никита Партанов, тав тонт рати-ват рўпитас.

Мәнэщи щырыл пүри хумус вэраве, тот хўлтыглахтым Евдокия Ивановна Ромбандеева пуңкототыс. Татьяна Гоголева мир акван-атыглас. Тинат Юван Шесталов

ос суссылтавет, мэхум ёт потыртас, тот ёмыгтас. Тасавит вәнэ мэхманув тув послувёсыт, сунсуңкве татем пўмыщ олыс. Та порат хэрмис тотвес, ассыныл нэгвес, пўрлахтын мэгсыл щёпитавес. Хумус юныгтавет ос нуйгалавес, таи тай ат суссылтавет, ётылнув пайтым нёвыль пасанын унттувес.

Тох ты пёс накув тинат хультыс, тот сунсыглаңкве рёви. Вячеслав Айзатулин тина послуңкве номылматас ос вэрыстэ. Таве ёмцакв вэруңкве Игорь Еремеев нётыс.

Семинарт мот мэхмыт потраныл ловиньтасыт, ты Римма Потпот, тав Белоярский рўпиты. Раиса Решетникова ос Евдокия Каксина ос нэ хайталан ос пүри вэрнэ урыл потырасыг. Юи-бвылт «Свадебный аргиш» Зинаида Лонгортова «Ямал-Регион» ёт послум тина суссылтавет. Тән ос салың мэхум нэ хайталан ос пүри вэрнэ урыл послысыт.

Галина КОНДИНА

Кит нәиңхәпыг яныгсәт сәвиткем пәвлытын тах хөиглэг

Яңк нәтнә этпос оигпам элы-пәлт «Николай Пирогов» ос «Святитель Лука» кит яныг нәиңхәпыг Ханты-Мансийск үст нәлув нарыгтавесыг. Лёккарыт округ янытыл мән пәвылкет блнә мирыт уральтаңке нәвумтасыт.



«Святитель Лука» йильпи нәиңхәп



Н. Ташланов

Кәсың туй ос тәлы сыс мән пәвлыт блнә мир уральтаңке Ханты-Мансийск үст «Центр профессиональной патологии» намба пүльницат рүпитан лёккарыт ялантәгыт. Ты лёккарыт туй сыс нәиңхәпыт хоты пәвылн хөиглэгыт ос тәлы сыс хумус рүпитасыт, та урыл яныг лёккар хум Николай Ташланов потыртас. Тав ляххал тотнә хөтпат эт яныгпөль этпос оигпам элы-пәлт хөнтхатыглас. Күщай хум ләвыс:

Нәиңхәпыг кит яг хосыт яласаңке патэг

– Ты туй я хосыт «Николай Пирогов» ос «Святитель Лука» намба нәиңхәпыг лёккарың тәгыл мән пәвлытын мир пусмалтаңке минэг.

Ты элы-пәлт округув янытыл сәв тәл «Николай Пирогов» нәиңхәп яласас. «Святитель Лука» лильпи нәиңхәп рүпитанке ань бвылтахты.

Ты элы-пәлт лёккарыт туй сыс атпан арыгкем пәвлын ялсыт, ань тән 94 пәвлын хөиглэгыт ос тот блнә мирыт уральтәгыт ос пусмалтәгыт. Нәиңхәпыг Конда я хосыт ос Тәгт яг ос мөт ят хосыт яла-

саңке патэг. Пәвлытыт лёккарыт сәвнун хөтал тот тах рүпитәгыт.

Лёккар хум ләвыс, «Николай Пирогов» нәиңхәп витын нарыгтан элы-пәлт ёмшакв уральтавес, маныр эри, хот-щәпитавес. «Святитель Лука» лильпи нәиңхәп мөлты тәл таквсы порат Ханты-Мансийск үсн тотвес. Тәлы сыс янытәт ищхәпың утыл вәрвес.

Тәлы сыс вәрүм рүпатаныл

Тәлы лёккарыт мәшинал мән пәвлыт блнә мәхум уральтым яласасыт. Ты рүпата урыл күщай хум бс потыртас:

– Кит арыгкем этпос сыс лёккарыт 54 мән пәвлыт блнә мәхум пусмалтасыт. Сәвсыр ищхәпың утыл вәрим 14 мәшина-тыл округ янытыл яласасыт. Тот 27 лёккарыт ос 28 мән лёккарыт пәвлың мирыт эт рүпитасыт.

Сәртын туп кит пиркәта лёккарыт рүпитасыт. Төва пәвлың мәхум уральтахтуңкв ат алы-мәлсыт. Ань сәвнун лёккарыт мәшинал округ янытыл яласасыт, ос аквта тәра сәвнун мәхум уральтаңке алымасыт.

Яласан мәшинат кйвраныл пүльница хурипаг вәрим бләгыт. Мир пусмалтан ос уральтан мәгыс сәвсыр ищхәпың утыт бньщәгыт. Тамле утыл сәвсыр тәрвитың агм хөнтуңкверөви. Мәхумты вәрмаль урыл ёмшакв вәгыт, ос уральтахтуңке, пусмалтахтуңке Ханты-Мансийск үсныл ёхтум лёккарыт палт тәра ювыт.

Николай Ташланов ләвыс, лёккарыт яласан мәшинат тәлы ащирма хөталт ләңхыт ёл ул вос-пөйтсыт, тән акваг уральтавет, матыр утанә ке сакваләгыт, тәра хотлөсталавет ос ёмшакв щәпитавет.

– Мир пусмалтан департаментыт рүпитан мәхумн ос округ миркол күщайтн ам яныг пүмашипа ләвөгум. Тән ты рүпатав мәгсыл акваг олн тәстәгыт, мән пәвлыт блнә мир урыл ат ёрувлэгыт.

Тәлы ләңхыл аква пәвылныл мөт пәвыл мус яласаңке сака тәрвитың, лёккаранув вәгтәл патәгыт. Ам тән рүпатаныл мәгсыл яныг пүмашипа ләтың ань ләвөгум. Ос ёмас ләтың пәвлың мирколыт күщайтн кәтэгум.

Мән акваг акваёт рүпитәв, кәсың пәвыл лёккаранув ўравет ос рүпитан мәл щәпитавет. Хоты пәвылн ос хоты порат тән минәгыт, бвләт пәвыл миркол күщайт китыглыянув. Ос ётыл ущ аква яныг план-нәпак хансәв.

Тәлы сыс лёккарыт палт алпияныл янытәт уральтаңке сәв мәхум ёхталасыт. Тән сәвыңпәлэ сым агм, нервный система ос эндокринный система агмыт бньщәгыт.

Юи-бвыл тәлыт мәхум ищхәпың утыл ёмшакв уральтавет. Тымәгсыл сәвнун хөтпат пувласпи агманыл сәртыннун хөнтавет ос тәра яныг пүльницан элалы уральтахтуңке кәтавет.

Күщай хум бс аква вәрмаль урыл потыртас, ты тәлы мән пәвлыт блнә кит хөтпаг лёккарыт палт ёхтысыг, тот илторыг матырен люлиг ёмтыс, алаты сорумн патсыг. Лёккарытын тәра нәтвёсыг ос санавициял яныг пүльницан пусмалтахтуңке кәтвёсыг, тох лылыңыг хультсыг.

Людмила
ТЕТКИНА

Потрыт хаснэ мӓхум вӓрмалъ

Ханты-Мансийск ӱст
Яӓк нӓтнэ Этпос
13-14 хӓталытт стихыт
хаснэ мӓхумыт нилыт щӓс
акван-атыглавӓсыт. Тӓнт
та хӓтпат мӓгыс «Форум
писателей Югры» нампа
тӓла вӓрыглавес. Тув ущты
хансуӓкв ӓвылтахтын
мӓньлат ӓгит-пыгыт, нӓврамыт
ханищтан хӓтпат, нӓпак
ловиньтан колт рӓпитан
мӓхумыт акв ӱсын вӓввӓсыт.
Тӓн халанылт вӓйхатсыт ос
румалахтасыт.

Тӓн кит хӓтал палыт сӓвсыр
колн ялантасыт, тот мӓй хӓтпат
мӓгсыл ӓмщакв хансуӓкв хӓснэ
ӓлумхӓласыт ханищтап вӓрыгла-
сыт. Тувыл тӓнки рӓпатаныл урыл,
маныр тӓрвитыӓ вӓрмалъ ӓлы,
та урыл потыртасыт. Акв тамле
тӓрвитыӓ тӓла лӓвсыт – тай кол
ӓтим, хӓт хаснэ мӓхумыт акван-
атхатыгланувыт.

Ӓвыл хӓтал ты вӓрмалъ «Россия»
нампа колт ӓлыс. Тот Югра мӓт
ӓлнэ нӓпак хаснэ мӓхумыт яныт-
лавӓсыт, тувыл пӓмащипа нӓпа-
кыл майвӓсыт. Тамле вӓнэ хӓтпат:
Владимир Волковец, Валерий
Каданцев, Елена Капитанова,
Елена Аушева. Югра мӓт ӓлнэ
мӓньлат ӓгит-пыгыт ӓс хансуӓкве
кӓсащӓгыт, матыр-ӓти тӓнки но-
мылматӓлӓгыт.

Акв тӓнт «Чистый лист» нампа
ловиньтан колн ялантан пыгыт
янытлавӓсыт, тай Максим Якубӓ-
нок, Дмитрий Скоков ос Леонид
Миронов. Тувыл мӓньщи нӓ Алла



Стихыт ос потрыт хаснэ хӓтпат

Иштимирова-Посохова «член
Союза писателей России» нӓпак
лӓмтыл майвес.

Мӓй хӓтпат Югра Думат рӓпитан
Борис Хохряков ӓйкан янытлавӓ-
сыт, тав тамле лӓтыӓ кӓтыс:

– Югра тай та мӓ, хӓт мӓхумыт
халанылт ӓмщакв ӓлӓгыт. Тыт
ащирман ос щуниӓ мӓт 139 мирыт
ӓлӓгыт. Нӓн, хаснэ мӓхумыт, мӓн
лылыӓ лӓтӓув ӓлалъ тотылыӓн.

Йтипӓла мӓй хӓтпат ловиньтан
суссылтапын ялсыт. Тот тӓнки хан-
сум потраныл мӓхумыт ӓлы-пӓлт
ловиньтасыт. Тувыл стихыт, пот-
рыт хаснэ ӓйка, «Роман-газетат»
редакторыг рӓпитан Юрий Козлов
ӓт хӓнтхатыглап ӓлыс. Тав такви
нӓпак ӓньщи, «Мраморное одеяло»
намтастӓ. Ты нӓпак урыл кӓсащам
хӓтпат номсахтасыт ос потырта-
сыт. Мӓхумыт тавӓн китыглахтын
лӓтыӓ акваг лӓвсыт. Акв тамле
китыглахтын лӓтыӓ нӓпакыт урыл
ӓлыс.

Мӓн ань ӓлӓв тамле мӓт, хӓт кӓс
маныр ищхыпыӓ утыт рӓви хӓн-
туӓкв. Та кастыл мӓхумыт нӓпак
урыл потыртасыт. Лӓвӓгыт, ань мӓ-
хумыт нас нӓпак мощца ловинь-
тӓгыт, пуссын потрыт ищхыпыӓ
мӓт ӓлӓгыт, таимӓгыс тот ловинь-
тӓгыт.

Хаснэ хӓтпат мӓгсыл ханищта-
пыт, суссылтапыт ӓлсыт. Югра
мӓт ӓлнэ мӓхумыт тӓнки лильпи
нӓпаканыл суссылтасаныл, та урыл
потыртасыт. Мӓньлат ӓгит-пыгыт
мӓгыс ханищтапыт вӓрыглавӓсыт.
Тувыл округ нӓпак колт рӓпитан
хӓтпат мӓгсыл ханищтап ӓлыс,
«тринадцатая летняя библиотеч-
ная школа» нам ӓньщас.

Ты тӓл ты тӓлат, хумус Югра мӓт
ӓлнэ хаснэ хӓтпат тӓнки вӓрмаля-
ныл щирыл Россият ӓлнэ мирыт
юртыӓщ ӓлуӓкве ханищтӓгыт, та
урыл потыртасыт.

Галина ДУНАЕВА



Ищхыпыӓ мӓт вим-хурит

Ойка стиханэ ловиньтэн ос мāньщи лātңыг толмащлэн

Андрей Семёнович Тарханов блме порат сāv стихыт хансыс, сāv нэпак тārатас. Ты тāl хōнтаң мāньщи ойка 90 тālэ тōвлынūв. Ты кастыл мāн, мāньщи газетат рупитан хōтпат, ос «Югра лылыёп» организация мāхум нйврамыт, мāньлат āгит, пыгыт мāгсыл касыл щёпитасūв – «Андрей Тарханов нэпаканэ ловиньтэв - блнэ мāv янытлэв» намаяслūв.



А.С. Тарханов

Мāн округут школат ос колледжит, университетыт ханищтахтан āгит ос пыгыт, стиханын, потранын «Лүймә сэрипос» газета вārнэ колн кётэн. Свердловский область Ивдельский районт блнэ лūsум мāньщи нйврамаквет хансум стиханыл, потраныл ос үрөв.

6-12 тāl яныт нйврамыт, 13-18 тāl яныт āгит-пыгыт ос 19 тāl ос тыгыл яныгнув мāньлат хōтпат хансум стиханыл, потраныл яңк нātнэ этпосныл 15 хōталэныл мāнь таквс этпос 30 хōталэ мус кетуңкве вёрмёгыт.

Касылув акв номинация щирыл вāрыслūв: Андрей Тарханов хансум стиханэ мāньщи лātңыг толмащлаңкве эрёгыт манос нāнкинāн стихыт, потрыт хансуңкв. Стиханын ос потранын мāньщи ос рущ лātңыл хансэң. Андрей Тарханов стиханэ мāньщи лātңыг ке толмащлэгын, рущ лātңыл хансум стиханэ ос кётэн. Хүрум стих манос потыр кетуңкв рбви.

Андрей Тарханов блнэ мātэ сака эруптастэ, янытластэ ос ты урыл

сāv стихыт хансыс, тымāгсыл блнэ мāv урыл хансэң.

Мāньщи газетат рупитан хōтпат, Ас-угорский институтыт рупитан учёныит, школат нйврамыт мāньщи лātың ханищтан мāхум жюри хōтпаг рупитаңкве патэгыт. Тāн нйврамыт, мāньлат хōтпат хансум стиханыл, потраныл ловиньтыяныл ос мāk ёмашакв щāнь лātың вāнэ āгит ос пыгыт пёриёгыт.

Жюри хōтпат яныг таквс этпос 30 хōталэ мус акван-атхатыглэгыт ос нōх-патум нйврамыт ос мāньлат āгит, пыгыт наманыл лāvиянūв. Тāнаныл мāн вāt сāграпнал этпос 10 щислат округув янытлан хōталэт янытлыянūв. Нōх-патум āгит, пыгыт мүйлупсал ос диплом нэпакыл мыганūв. Ос нйврамыт пуссын янытлан нэпакыл ищхйпың ут хосыт кётыянūв. Щар мāk ёмас потрыт, стихыт мāньщи газетан тах вāриянūв.

Мāньщи поэт урыл

Андрей Семёнович Тарханов Хōнтаң район Амāнья пāвылт мāнь таквс этпос 13 хōталэт мāньщи

колтāглыт самын патыс. Школа āсламе юи-пāлт Ханты-Мансийск ўст учителиг ханищтахтас. 1956 тālт Хōнтаң район Юмас пāвылн нйврам ханищтан хōтпаг кётвес. Та пāвылт акв тāl рупитас.

1957 тālт Ленинград ўсн А.И. Герцен нампa институтн элаль ханищтахтуңкве минас. Ты юи-пāлт Ханты-Мансийск ўст «Ленинская правда» газетат ляххал тотнэ хōтпаг рупитаңкве патхатас. Ты газетат 1958 тālт бōвыл стихе «Утро» (Алпыл) хасвес.

Олупсатэ сыс тамле нэпакыт тārатас: «Первая завязь» (1963), «Снежная симфония» (2000), «Исповедь язычника» (2003), «Колокол грянет» (2004). Андрей Семёнович нйврамыт мāгсыл стихыт, āмщит, мāнь потрыт ос хансыс: «Чудеса», «Флейта иволги зовёт», «Лесные доктора» ос мōтаныт.

Хōнтаң мāньщи ойка олум мātэ сака эруптастэ. Хōтал хумус āлпыл нōх-нэглы, хумус йтимлы, хумус ят витэ овты, хумус этпос посты, та урыл сāv стихыт хансыс. Тārатым нэпаканэ мāгсыл сака янытлавес ос сāv яныг намыл майвес. Андрей Семёнович 2017 тālт вōртур этпос 14 хōталэт āтимыг ёмтыс, Ханты-Мансийск ўст ёл-щёпитавес.

Людмила ТЕТКИНА

Тэн Президентский академиян ханищтахтуңкве вуйвесыг

Ювле хультум этпост акв маныщи хум Денис Вынгилев ос ханты аги Юлия Хорова Президентский академият мощцаг хультум сасса мирыт элаль тотнэ программа щирыл ханищтахтуңкве вуйвесыг.

Ты ханищтап Лүимат олнэ нэт бвыл Форуманыл резолюция-нэ-пакет хасвес ос Лүимат, Сибирьт ос Дальний Востокут олнэ мощцаг хультум сасса мирыт эрнэ ос так-

государственный служба академият III накут ханищтахтуңкве патэг.

Ань лүимә сасса мирытныл эхтум хотпат руц щирыл намтым «Актуальные проблемы и эффективные практики устойчивого развития коренных малочисленных народов Севера, Сибири и Дальнего Востока Российской Федерации» нампа программа эт вайхатэгыт.

Ты ханищтап савитэ 504 академический щес оныщи ос савсыр мирыт янытэт 6,5 этпос сыс тах ханищтавет. Тән хурум эрмыглан ос ванэ номт ханищтэгыт:



Ханищтахтан хотпат

сар специалистт ханищтан магыс олы. Проект некоммерческий колыт рупитан кущаит ос каркам хотпат, госслужбат, ляххал тотнэ хотпат ос промышленный компаният рупитан хотпат магыс щепитым олы, тувыл тән сасса мирыт олнэ регионитт пуссын вос рупитэгыт.

Ты ханищтапын ань Россия янытыл олнэ 14 савсыр Лүиманыл, Сибирьныл ос Дальний Востокныл 15 элумхолас эхтысыт. Ань Югра маныл олнэ сасса мирытныл ты кит хотпагув бвыл щес тув ханищтахтуңкве миначыг. Тэн «Югра лылыеп» ос сасса махум манылат организацияг палыл тув кетвесыг.

Денис ос Юлия бвлэт мот лүимә агит-пыгыт эт кассыг, тот нхпатсыг. Ос яныгполь этпос пасыл 2026 тал оигпан мус Москват Российский Федерация Президент палыл народный хозяйства ос

– Лүимат, Сибирьт ос Дальний Востокут мощцаг хультум сасса мирыт савсыр вэрмалит нупыл суснэ ос тув ровнэг ханыщувлым вос олсыт;

– мощцаг хультум сасса мирыт маны бизнес-проектаныл ос тананыл элаль тотнэ, савмалтан вэрмаль;

– лүимә мирыт магыс пуңкотнэ некоммерческий организацият, бизнес-тэлат ос ляххал тотнэ колыт кущаит эт акван-нэтхатым рупитаңкве вос ханищтахтэгыт.

Денис Вынгилев ты урыл тох потыртас:

– Тыт манап ханищтан хотпат сака номтыңыт, кос хоты эрнэ тэлат емщакв ваганыл ос тувыл тананыл хумус макуг элаль тотуңкве эри, манапн хултэгыт. Тох мән Дмитрий Анатольевич Функ эт вайхатасүв, тав ищхыпң ут хосыт



Д. Вынгилев, Ю. Хорова

щань латңыт тув тұлнэ программат урыл манапн потыртас. Ам ань ты лектор-хум эт элаль рупитаңкве лавхатсум. Маныщи латңув ищхыпң утн тұлвес, тыи сака емас. Ань пес йис наканув макуг тарпаттыанүв ос ханищтыанүв, тувыл тув тұлүңкве ос эрэгыт. Ты бвылтыт ань номсахтэгум.

Тувыл Евгений Григорьевич Лукьянцев, РФ дипломат-хум эт вайхатсүв. Ойка такви сэрьер рупататэ бвылтыт потыртас. Ма янытыл олнэ савсыр мирыт эт акван-хонтхатыглахтын порат ос касыңаныл эт потыртан магыс матыр-ати сав ваңкве ос хасуңкве эри. Ань төва махум эт потыртан магыс Григорий Евгеньевич английский ос французкий латңыг емщакв вагаге. Анумн тыи ос пумащ, мән академият тох ты ханищтавев.

Лүимә сасса хотпат ханищтахтуңкве асланэныл юи-палт Президентский академия палыл дипломыл мивет тах. Тән тонт «Специалист по эффективным практикам устойчивого развития КМН Севера, Сибири и Дальнего Востока РФ» тащирыл лавнэ рупатат элаль тотыяныл тах.

Тамара МЕРОВА

www.khanty-yasang.ru

Үс мир ыти мус пұмщалавёсыт

Кәсың тўя яңк нәтнэ этпост «Ночь музеев» нампа тэла вәрыглаве. Тонт Россия янытыл рўпитан музейт йти мус рўпитэгыт ос мир мәгсыл сәвсыр суссылтапыт щёпитэгыт. Ты тәл тамле пұмаш вәрмалъ яңк нәтнэ этпост 16 хөталэт блыс.

Ханты-Мансийск үст «Торум Маа» музейн мўй мәхум йтипалаг акван-атхатасыт. Ты кол кўщай нэ Елена Терентьевна Федотова ләвыс:

– Россия янытыл кәсың музей сәвсыр суссылтапыт вәрыглы ос йти мус рўпиты. Ты тәл тамле пұмаш вәрмалъ «Родное» намаявес. Мән музейт сосса мирыт блупсаныл, пёс йис вәрмаяныл урыл потыртэв. Матёмас нән музейн ёхтысын, мән сәвсыр ёнгилыт, ханищтапыт щёпитасу́в. Музейн ёхтум мир йти мус пұмщалавёнув, тамле рўпатав щәгтым вәрилүв.

Ты юи-пәлт мўй мәхум «Диалог с вечностью. Изобразительное творчество братьев Гришкиных» нампа суссылтапын вөввёсыт. Гришкиныт хўрум ханты хумыт Хәльүс район (ань Белоярский) Тугияныл пәвылт самын патсыт. Тән кәтыл пөслум хурияныл музейт суссылтавет.

Тувыл мўй мәхум сәтапыл сәвсыр ёнгынутаыт сагсыт, «щёл» нампа ёнгилыт ёнгысыт, кәтыл хурит пөслысыт.

Музейт рўпитан нэ **Елизавета Ромбандеева** мўй мәхум вәти сорп совъявәит хорамыл щуртуңкве ханищтасанэ. Нэ ләвыс:

– Тамле ләгыл маснут ханты мә-



С.М. Астапович

хум оныщёгыт. Совъявәй сәлы со- выл юнтаве ос нәтнэг сусхатнэ мәгсыл олюпыл сартаве, хорамыл щуртаве. Сөс, тарыг ос ульпа сұл витыт хоса пәйтавет ос тамле олюпыг ёмты. Мән ты олюп тўяг пәйтыслүв, тав хопсат оспа хурипаг олы. Таквсы порат пәйтым олюп о́с оныщёв, тав щар сәмыл оспа хурипа.

Елизавета кәсың хөтпа сов лөмтыл мистэ ос хорамыл хумус щуртуңкве – хұлтсанэ.

Татьяна Тихон ёт мәхум мәнъ сөвырквет сагсыт ос ты ёнгынутаыт «Зайка-защайка» намаим о́л- сыт. Тамле сөвырквет ўргалахтын мәгсыл сагавет ос СВО мāt хөнтлан мәхумн кетавет. Ты коныпал мўй мәхум ўсат сагуңкве, тёр-сәлмыл нәсалаңкве ханищтавёсыт. Ысат СВО мāt хөнтлан сәлтатытын сака эрөгыт.

Юван Шесталов колнакыт мәнъщи ос ханты ләтңыл потыртәңкве кәсащан хөтпат ханищта- вёсыт. Тамле пұмаш вәрмалъ «Родной язык ханты и манси.



З.Н. Лозямова

Словестные игры» намаим блыс.

Мөт колнакыт о́с сәвсыр пұмаш ханищтапыт, ёнгилыт вәрыглавё- сыт. Ос ты юи-пәлт мәхум пуссын концерт сунсуңкве вөввёсыт. Овлэт ханты эква Зоя Никифоровна Лозямова пёс эргыт эргыс. Тувыл «Лўи сәм» ос «Ёмвош ёх» мәнъщи, ханты коллективыг эрганыл мәхум хўнтлысыт. Ас мәнъщи нэ Светлана Астапович әкве Надежда Андре- евна Тынзянова «Төя уи» эрыг эргыстэ. Музейт рўпитан ханты хум Валентин Неттин ос Ас-угорский театрыт рўпитан мәнъщи нэ Юлия Яркина турсуиң эрыг эргысыг.

Ты юи-пәлт «Вузя вуллаты» мән округувт пөслым кина суссылтавет. Ты кина Василий Косполов вәруң- кве о́с нәтыс. Кина хумус пөслувет, та урыл потыртаңкве вөвыглавет.

«Торум Маа» музей эт котиль мус рўпитас, тот кәсың хөтпа такви мәгсылэ пұмаш тэла хөнтыс ос юв ёмас номтыл минас.

Людмила ТЕТКИНА



Мән сәлыңколт яныгмасу

Яңк нәтнә Этпос
16 хөталә
Генеральный ассамблея
ООН организациян
колтәглыт янытлан
мирхал хөталыг ләввес,
рущ ләтңыл намаявес
«Международный день
семей». Тот рүпитан
хөтпат ты урыл 1993 тәлт
сүкыр Этпос 20 хөталәт
ләвсыт, тувыл 1994 тәл
пәсныл мә янытыл өлнә
мир яңк нәтнә Этпост
мүйлуңкве та патсыт.



Сергей пыге ос апыгрищаге ёт



Клавдия Васильевна пормасыт урыл потырты

Тамле ялпың хөтал
кастыл ам Хәльүст өлнә
эква Клавдия Василь-
евна Койнова ёт хөнт-
хатыгласум, потрамасум.
Клавдия Васильевна
мәнь тәгыл омаге-әтыге
ёт сәлыңколт яласас,
яныг колтәгылт яныгмас.
Элнаң сәлың мәхум нъя-
раманыл мәнь тәгыл ёрн-
колт яныгмасыт, төваныл
тот самын патсыт. Таи-
мәгыс тән сәлы үрнә тәла
ёмашакв вәганыл. Клав-
дия Васильевна өс акв-
тох – сәлың мәхум өлупса
вәгтә, ёрнколт хумус өл-
сыт, әтятә ос рүт мәх-
манә сәлы үрим хөт
яласасыт, та пора тав
пussyн номитә.

Хүрум тәл ювле хуль-
тум порат тав Хәльүс
районный Дом культуры
колт сәлың мәхум өлуп-
саныл урыл потыртан ос
пормасаныл суссылтан
колнак щёпитас. Тув
мәньщи ос саран маснут,
сәвсыр пормасыт ос ху-
рит атыс.

Нән ань элалы **Клавдия
Васильева Койнова** потре
ловиньтәлбн.

– Ам тәл котиль Этпос
21 хөталәт 1944 тәлт
Няхщамвөль пәвылт са-
мын патсум. Атям саран
хум өлыс, наме Василий
Иовлевич Рочев, 1906
тәлт самын патыс. Омам
мәньщи нә – Федосья

Даниловна, такви өпарищ
наме Анемгурова, 1921
тәлт самын патыс.

Мән сәт нъярам өлсүв
– хүрум ягәги ос нила
ягыг. Ам нумпал Галя
увчим өлыс, тувыл Мария
эщум самын патыс, тав
Челябинский областьт
Миасс үст өлы. Кит әпщи-
ягум хосат әтимыг ёмтсбг.
Василий әпщим Красно-
дарский край Ейск үсн
вәнтлыс, Сергей Няхщам-
вөль пәвылт өлы.

Мән pussyн нёрт сәлың-
колт яныгмасүв. Мәнь-
пупыгнёр, Яныгпупыгнёр
ос мөт нёрыт pussyн
вәганүв, та ляпат өлсүв.
Өпагум-щащёквагум

Коми республика Ижем-
ский район ёрныл өлсбг.

Саран ләтың сәв диа-
лектыт өньщи, атям рүт
мәхманә ижемский
диалектыл потыртәгыт.
Ты ләтңув ам мәнь тәгыл
вәглум, таимәгыс рүтанум
ёт күстырыг потыртәгум.

Пёс порат улпыл сәлы
тәп мощца өлыс манос
копытка нампа үйхул әгм
ёмталас, атям рүт мәх-
манә матрыг округув ну-
пыл вәнтлысыт. Сәв сәлы
өщсыт. Өвләт Свердлов-
ский областьт мус мина-
сыт, Верхотурье үс ляпат
өлсыт, атям тот хөт самын
патыс. Тувыл Няхщам-
вөль пәвылн ёхтахтасыт.



А.Т. Рочева, П.К. Рочев, Д.В. Анемгуров, А.И. Анемгурова,
М.И. Лызлов, М.А. Анемгурова, П.Д. Анемгуров,
О.И. Семёнов-Тян-Шанский, 1956 тәл



Д. Тасманов, Я.И. Рочев, В.И. Рочев.
Няхщамвөль пәвыл, 1958 тәл



Сергей, Александр ос Алексей пыганэ ёт



Оматэ Ф.Д. Рочева



Атятэ В.И. Рочев. Ты хури В.А. Игошев пöслыстэ

Щащёквам Марианна Ивановна, такви бпарич наме Ануфриева. Ам таве номилум, 97 тал блыс.

Опам ос кит пыгаге тиф агмыл хэхтувёсыт, хотталы шалтсыт. Атям бс тамле агмыл савалас, тувыл пусмалтахтас, нбх-вёрмхатас. Тән хурум лылың тәгыл хультсыт – атям, Глафира эще ос Яков ащитэ. Хунь яныгмасыт, пуссын салыт бщсыт, щёмьян-няврамың тәгыл ёрнколт яласыт.

Омам рүтанэ бс салың мэхум блсыт. Ащбйкак-гум-анёквагум салы үрим яласасыг. Ащбйкам Данил Васильевич Анемгуров Хаңласам павылныл блыс. Анёквам Анастасия Ивановна, такви бпарич наме Вынгилева, Няхлаң павылныл блыс. Омам Хаңласам павылт самын патыс, тав шар яныг. Тав юи-пал Анна, Ольга, Даша эщанэ ос Петр ащитэ самын патсыт.

1937 тәлт репрессия тәла порат атяныл, Данил Васильевич ащбйкам, Григорий ягыгёнт сутытавёсыг, Тобольск үс нупыл тотвёсыг. Омам тонт 16 тәлэ төвлыс. Тән Аня эщёнтыл вбраясыг. Салыт бщсыт, салыяныл үрим блсыг. 1947 тәлт ащбйкам ягыге ёт юв ёхтысыг. Ләвег, сав хөтпа

сутытавёсыт, тән туп лылың тәгыл хультсыг.

Атям потырталыс, репрессия порат салыт яңкылман нявлувёсыт, тот алышлавёсыт. Сав салы патыс, яңкылма шар выгыр блыс. Ты мәгыс сыме сака щәргыс. Номилум, та пилышмаң пора урыл потыртаңкве паты, лющтурн ёхтаве.

Тән руц ләтың ат вәсыт, элыл ёхтум мэхум ләвсыт, ань колхозыт вәравет, салыт пуссын тувле нявлавет. Тән вощыг хоталы вәрхатэгыт, пори ләтың ләвёгыт, накн патэгыт. Хбнтлын нак порат атям ос салы үрнэ мэхум сав рүпитасыт, «Труженик тыла» нэпакыл майлувёсыт.

Юн мән кит ләтңыл потыртасүв – мәнщи ос саран ләтңыл, омав саран ләтың вәс, атяв мәнщи ләтың.

Омав хосат атимыг ёмтыс, тонт Ваня ащширищув ущты бвыл классын минас. Мән атявн янмалтавёсүв. Тав ётыл хотталы шалтыс.

– Школат нән Няхшам-вөль павылт ханищтахтасын?

– Мән пуссын Няхшам-вөльт ханищтахтасүв. Ам школа асламум юи-пәлт педучилищат ханищтахтасум. Тувыл школат

моц рүпитасум, хум вәр-сум, наме Василий, тав ётэ Украина мән вәнтлысамён. Тот ам 1970 тәл-ныл 1997 тәл мус блсум, хурум пыг янмалтасум – шар яныг Алёша, котиль пыгум Серёжа, мән пыгум Саша.

Тән пуссын ам ётум округун ёхтысыт. Алёшам атимыг ёмтыс. Агитэ наме Ксюша, тынакт 17 тәлэ төвлыс. Серёжам Коми республикат Ижма павылт блы. Экватэ саран нэ. Тән хурум няврам янмалтэг – кит агирищ, акв пыг. Тән тот пуссын саран ләтңыл потыртэгыт. Мән пыгум Тюмень үст ханищтахтас, ань Югорск үст блы, электрикыг рүпиты.

– Клавдия Васильевна, ты музей колнак вәруңкве хумус номылматсын?

– Ты пормасанув тыт 2023 тәл пәсныл суссылтыянув. Светлана Алексеевна Попова аңквәгим ам нуплум ләвыс, тав колтәглэ ёт үсн вәнтлы, юн тасәвит пормас, хотталы тотуңкве, ат вәгтэ. Ёрнкол блтұлыт, мәнщи ос саран маснут, савсыр алышлапыт, та маныр. Ам ләвёгум, тамле пормас ам юн сав бньщёгум, бс центрын тотнуванум. Тувыл район культура кол кұщай палт ялсум, китыглахтасум, эрың пормасанув мәгыс кол-

нак тәстуңкве вёрмёгыт? Тав ам ётум кәсащас, ләвыс, колнак мәнти вос щёпитылүв.

Клавдия Васильевна колнак хот-щёпитастэ, пормасаныл тув тотсаныл. Матыр-ати тот ань пуссын блы – салыңсун, маснут, няврам ёнгил, пёс хурит ос мот сав пормас. Светлана Алексеевна бйкатэ бс салыңколың мэхум рүтныл блы, тән пормасаныл бс тот бләгыт.

Сав хури акван-атсыт, кәсың хури урыл Клавдия Васильевна хоса потыртаңкве вёрми. Хбңха тот пöслым блы, хөт пöслувес, хоты тәлт. Тувыл тән палтаныл кәтыл хурит пöслум бйка Владимир Александрович Игошев ёхталас. Атятэ, оматэ ос павыл мэхманыл пöслыгласанэ, ты урыл бс потыртас. Таве хунтлуңкве сака пұмыш.

Газета ловиньтан мэхум, Хәльүсн ялнән порат культура колн шалтсән, салың мэхум пормасаныл сунсыглән, пұмщалән. Клавдия Васильевна пұмщачипа ләтың ләвёв. Пус кәт, пус ләгыл вос блы, Нәй-Отыранән вос үргалаве!

Светлана
РОМБАНДЕЕВА

Нёрт сака пұмаш

Сәлы үрнә вәрмалъ сака тәрвитың. Кәсың тўя сәлы үрнә мәхум сәлыяныл ёт нёрн вәнтлэгыт, туи сыс нёрт өлэгыт, таквсы нәлув вәнтлэгыт. Тох та тәлэ-туве, тәл палыт сәлыяныл ёт вәнталәлэгыт, Этаң-хөтал тәнаныл уральтыяныл, кос турап хөтал, кос вөтасың хөтал тәнккёныл ат хульгуптыяныл. Туп самыл-палил өщнә сәлы элалъ яныгми, сәвыг рүтми.

Ам аквнакт Александр Иванович Монин ёт по-тыртасум, ты бйка мәниг өлме порат өс сәлыңколт яласас, рүпитас. Тав такви Кимкъясүй павлың хум, ань тәланә сәвыг ёмтсыт, әгитә пәлт Хулюмсүнт пә-вылт өлы. Мён потрумён элалъ ловиньтәлбін:

– Александр Иванович, нёрт яласам урынтыл потыртән.

– Нёрт сака пұмаш. Щар хөталың хөтал тай әхвтасыт исыглэгыт, такәм рёгың. Тувыл мәтә-вөре тамле, акваг сәкв лылыёпыл лылтэгын.

– Манарыл нёрт өлсын, палаткал?

– Әти, мән ёрнколыл өлсүв, сәскол та порат. Акваг сәсныл вәрима өвләт. Тувыл ётыл тай рыбучасткан патсүв, ань парщин нәглуңкв патыс, тай-тай парщиныл пант-хатәв. Тувыл ань қотилът күр ўнлы. Ань ёрнкол атхунь вәглын. Тувыл ань хасапыт маныр акваг кит-пал пәлыт нәгим өлэгыт. Хөт ёл-хуёв, хасапанув ёл-тәрмәтъянүв.

– Наң ләвёгын, нән ат сәлы үрнә хөтпа өлыс, пуссын янас колыл өлэ-гын манос акв колт?

– Кит ёрнкол, акваг ёрнколыл. Ань әнасыл тәлттавет, та минәв. Тувыл ань хөт кол тўштунқв патәв, кит кол та тўштәв. Акв колт тай ат өлыгла-сүв, акваг кит ёрнкол.

– Ос тўяг иң яныгпөль этпост минэгын тай, совья колт өлэгына манос өс сасколт өлэгын?

– Тай-тай вәнтләв, ту-выл ань этипәлаг хөт хуль-мыгтәв, тәра ёрнкол та тўштыгпёв. Кол кйвырт өлэв. Таквсы өс нәлваль йиңкв патәв, өс ань хөт этимлаңкв паты, өс ёрн-кол та тўштәв. Акваг та-щир та. Ос тамле хара мәтат өлсув. Акваг ёрнкол кйвырт. Ос ань нёрт мән, пастухыт, сәлыянув мөт мән ке тотыянүв, ёрнко-лыгт тай тот экват маныр хультэгыт. А хум мәхум ос ань палаткат өньщёв, кўрың-лўтың тәгыл янас палаткал минәв, ос хөт мөт мәт тот өньщиянүв. Тай мән хум мәхум па-латкал яласәлсүв, хаса-панув манаранув, хуйнә сованув ёт.

Аквматнакыт тай та-щир ёмтыс, ань вөртур этпост, я-та, ань Аңквал-



Александра ос Александр Мониныг, 2022 тәл

суп-нёлн минасүв. Ань рёгың хөтал. Матырсыр урыл ам тай ос хуйнә-хүргум ёт әлмаяслум, ўн-лын мәмн пинумтаслум. Ань мәхманум тай хумыс өлсыт, такем рёгың, та-щир та минасыт. Этипә-лаг патыс, ань палатка тўштысүв. Я-та-ты, вөтасыг та ёмтыс, тўюңкв та патыс! Вөртур этпост. Я-та-ты, палаткав тай тыгле-тувле та нуйгата-лаве. Ам тай хуйнә хұрыг кйвырн щалтсум. Тән тай та хәйтыгтэгыт, палатка-ныл әхвтасыл пинэгыт, та манарёгыт, акваг тащир та мувылтахтым өньщия-ныл. Тувыл тәл вөтасә моц хот-пөйтыс, эти тўюңкв патыс. Ань тайиянум тай, хотмус щуңкыртахтасыт

та. Ам тай хуйнәхұрыг кйвырт хуясум.

Я-та, ань әлпыл кон кос квәлэв – щар ты пәсыл тўйт. Я-та, ань хотьютув сар сәлы пөсуңкв мины нәлув? Ань вөрн тәра-тасанүв. Хотьют пёщаге хосаг? Акв бригадир ань Андрей мөйтың өлыс ос ам пёщагум хосаг.

Я, мән та минасамён вөрн. Ань нас рөхтыян-мён, тувыл тәнки нөх та ювыт. Пәләкем сәлыт нөх йисыт, тувыл ань тыт сәлы пувсүв. Тәнаныл өс вөрн тәрматсанүв. Мәнки тувыл ёрнколн та тәлматсүв. Тувыл тот ос моц турапе пөйтыс, мас-хатсүв-манарасүв, тувыл өс сәлыянув палт уц та минасүв, ос нөх-рөхтыса-нүв. Өлэгыт. Хәйтнут тай әтим өлыс.

Ань вөрныл нөх-рөхтуңкв патыянын, ань ләхс порат тай, таквсы нәлманыл щар сөви патэгыт, пукияныл яныгт. Ворил-ворил ты, мән нёранув талкват, ворил ты нөх саким ювыт.

– Ләхс порат май ләвёгыт, сака ләкква-миныглэгыт.

– А-а, ләхс сака тэгыт, тувыл ань, ты тамле хәль тыт уйит, хәль тытыт щар



Полина ос Кристина әгитә әгииг ёт, 2026 тәл

Танки павланыл вос Эрүптүяныл

Любовь Павловна Стаканова ты Этпост ват нупыл овыл хоталэт намхоталэ олыс, мән таве янытлылүв ос ань тав кәркамыг вәрнэ рүпататэ овылтыт потыртаңкве таңхөв. Тэлы Саранпавылн ялмум порат музей рүпитан колэн щалтсасум ос олупсатэ урыл китыгласлум. Тав агииг-пыгыг тэн пүмщалан тэланэнт матыр хултыглас, Любовь Павловна тонт лавыс:

– Ам ётум Исторический клуб колнакт ань Коля Гоголев ос Ира Ларионова олэг. Тэн тэнки матыр ханищтан тэланэн тара-паттыянэн, потыр хансэг ос катыл хури пöслэг, ам тэнатэн матыр нётэгум, хултэгум. Ты рүпататэн овылтыт янас тах потыртэв.

Ты сака тарвит вәрмалы кос, овыл щёс Исторический клубн ёхтум агирищит-пыгрищит овлэт танки рүтаныл ханищтым потыр хансэгыг, тувыл ущ танки матыр кәсащан номт вәрөгыт ос таве элалы ханищтым доклад щёпитэгыт. Павлувт олнэ рүпитан колыт янгыщ пуссын макыг тара-паттүвёсыт, ёмщакв ханищтавёсыт ос нэпакн хасвёсыт. Таимәгыс касың няврам такви хотты элумхөлас хонты ке, тав щёмьятэ китыглым сыре-сыр тэлат тара-паттыянэ, мот тэлат хотты нэпакыт ловиньтыянэ ос та юи-пәлт мұсхалыг докладэ щёпитытэ. Тувыл конференция вәрыглан порат ты потраныл махумн ловиньтыяныл.

Мән ань, музейт рүпитан хөтпат, маныр акваг вәрөв, ты овылтыт потыртэгум. Ты Исторический клубу в макыг ос ёмщакв нилахуйплов тәл рүпиты, това агит-пыгыт ань школа асласыт ос мот мән элалы ханищтах-

туңкве минасыт, пыгыт армиян вивет.

Тувыл махманув хан-



сум потраныл кит конференцият ловиньтыяныл, аквагэ «На горных ветрах времени» – овлэт мәнки музейовт щёпитәлсүв, ос мөлты тәлт Хәльүсн вöвиньтәлвесүв, мөтыт тәлн Ягримн аквагн-атхатуңкве потыртахтасүв. Китыт районуң конференциян «От краеведения к краелюбию» ос ялантэв, тот махум потранувтыл сака пүмщалахтэгыт.

Хүрмит пүмаш тэлав ты «Что? Где? Когда?» ёныг щёпитәлэв. Тамле номтың ёныг вәрыглаңкве мән 2018 тәлныл патсүв. Ань тасәвит команда атхаты, тыи Саранпавылт олнэ рүпитан колыт танки халанылт касэгыт. Тувыл акв ёнгүв мән «Кто?» ләвнэ ләтңыл нётүвьяслүв, тонт мәнки мавт хоты вәнэ элумхөлас



Ира ос Л.П. Стаканова

сыс тот сәлыт пöслым олэгыт ке – сәлы хәйтнэ суй манос лөңханьщап хотыл суйты, таргыт кәсалэгыт ке – илттыг вөр суй хунтамлэгыт, мот порат хөт үйрищит луйгуңкве овылтахтэгыт. Ань тащырыл хурит нупыл сунсуңкве сака пүмыщ.

Мот колнакт пәрт тармыл яңк нэпак тагатым олыс ос тот махумн «Саранпавыл 2050 тәлт» хумус щырыл кәсалаңкве таңхияныл, таи тув вос пöслыяныл. Мән ань сускөвт, тот ЛЭП нәйквәлгыт олэгыт, Сүкырья мус я хосыт унсах вәрим олы, тувыл спортостеатр колыг пöслымаг. Тувыл Нёрыт, ёрнколың махумнәңкөгыт, ят хулыт пöслымат, тыи сака ёмас. Парк Победы намтым павылкан ос пöслысаныл, тувыл машинал яласан тэлы лөңх атим, тав пентсылэ яныг товылхәп ос көр лөңх, автобус хотьютаныл пöслум.

Ань пуссын ты вәрмалит тэлаг вос ёмтнувыт, мән музей хөтпатн пүмыщ рүпатаныл магыс пүмашца ләтың ләвөв.

Тамара МЕРОВА

Аги совъявәит юнтнэ урыл потыртас



Дарина Яврова

Түяг Ханты-Мансийск үс ремёсла колн савсыр мәныл кәтыл пормасыт мәщтырлан агит-пыгыт ёхталасыт. Ты вәрмаль пёс йис пормасыт нөх-вөрмалтан мәгыс китыт тәл вәрыглаве. Төнт Хәльүс район Тэк пәвилныл ханты аги Дарина Яврова ёхталас. Агикве нятрат ос совъявәит юнтнэ урыл мәхумн потыртас.

Дарина ләвме щирыл, мән округт савсыр мәт өлнэ сосса мәхум пёс йис тәгыл хорамың маснутыт ос ләгыл маснутыт юнтыгласыт. Кәсың мәныл өлнэ хөтпат хорамыт тәнки щирыл юнтсаныл. Хоты мәныл хөтпа олы, маснут хосыт ханыщүңкве рөвыс.

Лүймәт өлнэ сосса мәхум түи ос тэлы порат өщнэ нятрат, вәит ос совъявәит юнтэгыт. Ос тамле вәрмаль олы, кәсың тәлныл ты мәщтырлан тэла акваг юв та хулыты. Ты юнтнэ вәрмаль хот ул вос сөймыс, Дарина ты рупата ёмщакв ханищтаңкве номылматастә.

Аги мән тәгыл хорамың маснутыт өныщас. Туи порат пәвилыт совъявәил хайтыгтас. Тэлы, ащирма порат, ләглаге ул вос пөльвесыг, өс вәй масыглас. Ты маснутыл тав щәщөкватән ос оматән юнтыглавес. Ань Дарина ты вәрмаль ёмщакв ханищтастә ос совъявәй юнтнэ урыл мәхумн потыртас.

Пёс сосса мәхум туи порат совъявәил масхатасыт. Тамле ләгыл маснут күпнит, элумхөлас ләглаге ат пөлявег, яңкылма хосыт ёмыгтаңкве күстыр. Совъявәй яңгуй манос сәлы котыл юнтыглавес. Вит ул вос тәратас ос хоса вос вөрритас, совъявәй вөрүй вөил сартыглавес.

вөяныл хот-осгавет, тувыл витыл тытылтавет ос совыт кәминьтаг вос ёмтсыт, пөлям мән пинтләлавет. Тувыл котыт ләгылпатта щирыл йинавет ос лөмтыт пуссын акван-юнтавет. Юи-өвилыт сове янытэт вөил сартаве.

Маснутын юнтым хансат элумхөласн үргалан тэлат тотсыт ос хөтпа мән-вит тармыл хоты рүтныл олы, тәра хәщвес. Лүймә ёрт өлнэ ханты нәквет маснутаныл палт порыгпанэква ос пөрна хансат вәтихал кәсаләлаве. Порыгпанэква, пөрна ос хәльийв тов хансат нэт үргалэгыт.

Ты хансат тәк-әкв үргалэгыт, юн матыр-әти пуссын ёмас вос



Потырт хунтлуңкве ёхталам мәхум

Ты ләгыл маснут элы-пәлэ хансат юнтаве. Хансат матахмат сов лөмтытыл юнтвөсыт. Хөтпа хоты рүт мәхумныл олы, тав щёлың манос әти, хорамыт хосыт тәрапаттуңкве рөвыс. Совъявәй патта осың котыл юнтвес. Ёмыгтан порат ләгылпатта матарын ул вос пөльвес. Төванакт кйвре пуныңыг вәрвес, тав ёмщакв рөг пүвыс. Совъявәй нэгнэ квәлыг өс совытыл манос сәс сәлмытыл вәрвес.

Совъявәй юнтнэ мәгыс ты пормасыт эрөгыт: сәлы сов, котыт, тән, юнтуп, касай ос котыт сартнэ мәгыс вөрүй вөй. Совъявәй юнтнэ мәгыс ёмас сов щөпитаве. Овлэт совыт

өлыс. Нәквет ты хансат турлөпсыт, пальсақыт ос энтапыт палт вәтихал вәрыглыяныл.

Тувыл Дарина тох ләвыс: «Сосса мир ләгыл маснутаныл юнтнэ вәрмаль элалы тотуңкве эри. Ань мүй мәхманув сосса маснутыл өс пүмщалахтуңкве патсыт, вәтихал ёвтэгыт. Матьёмас ань ремёсла колт савсыр мирыт пёс йис өлупса вәрмалит нөх-вөрмалтаңкве патсыт. Сакати, ты хосыт мәнки маснутанув суссылтэв, юнсхатуңкве ханищтахтэв ос ты урыл потыртэв».

Николай МЕРОВ

Маньлат щәмьят мағыс мән щәгтым блэв

Тэлы Саранпавылн ялум порат Любовь Албина ёт акван-хонтхатыгласмён. Тав мән тәгыл «Мән Ёске» ўшлахтын мән ялантас, тот мәнщи латың ос матыр маснут ёнтуңкве ханищтахтас. Ты тәлаге тавён мўстысыг ос элаль блкет эрмыгласыг, тав ань хумус блы, маныр вәри, ты бвылтыт тох потыртас:



Леонид ос Любовь пыгён ёт



Л. Албина

– Паща блэн! Ам намум Люба, амки аги бпарищ намум Артеева. Кит тәл ювле хультум порат хум вәрсум, ойкам наме Леонид Сергеевич Албин. Мён ань мән пыг янмалтымён, наме Костя. Ань пыгкем янмалтым юн ўнлэгум. Тох тай Саранпавыл мирколт махум колыл минэ инспектор-хотпаг рупитэгум.

Ты элы-пәлт Ханты-Мансийскат Югорский государственный университетт туризм-тәлат ёмщакв ханищтасанум ос таве әстламулт Г.С. Райшев, хурит пәслум хум, галерея-мастерской колэт мощ рупитасум. 2021 тәлт Саранпавылн ювле йисум, ань та пәс-ныл юв та блмыгтасум.

Тыт хум вәрсум, мён сас мәнщи щәмьят яныгмасмён. Хумим ань налыман нупыл ат тәлэ, әнумн вәт нупыл нёлолов тәл, таимәгыс иң мәнлат щәмьяг ловиньтахтымён. Сыре-сыр льготат ат кос вәщиньтасмён, павылт таи ёмас – сас рупата бньщимён.

Леонид рүтанэ Лбмпус павылныл блэгыт, тот Тамара Алексеевна Хозумова ома тә ос Щёрки әпщитэ блэг. Пыгрищиг әщён хұл алыщлым щаквыт әтимыг ёмтыс. Лёня Кульпаст школа әстлас ос Голошубин предприниматель-ойка пәлт рупитаңкве патхатыглас, тувыл 2009 тәлт армиян вуйвес. Тав Красноярский ёрт тот лусытас, аквьёт лусытам юртанэ ёт ань тыг мус вәнэг блэгыт. Тән тәнки блнэ мәнанылн ләкква-мингаламаныл юи-пәлт ищхйпың ут тәра хонтхатасыт, потыртэгыт.

Леонид ань Саранпавылт вөр уральтан мәт най харыгтан десантник-хотпаг рупиты. Тэлы тән отчёт вәрим сыре-сыр нәпаканыл ёт капыртэгыт ос яңк нәтнэ әтпосныл таквсы ойгпан мус най харыгтым хот-әти яласэгыт. Тованакт тән Хальүс район коньпәл шар мөт мән тотыглаңкве вёрмавет. Россия янытыл тамле бвылн патнэ махумн тән бс нәтэгыт.

Ам ос мәнщи-саран

щәмьят яныгмасум, омам Евдокия Митрофановна мәнщи нэ, әтям Алексей Иванович Артеев саран хум. Ам ты мирныл блнэ махум сас эруптыягум ос мәнщи латың ман пәс наканэ ханищтаңкве әнумн сака мўсты. Омам ос әтям яныг щәмьят яныгмасыг, тәнки нила нйврам янмалтасыг. Ам кит қаңк, Унтари ос Паял, тувыл Галина йигрищ бньщегум. Тән пуссын щәмьяңыт, Унтари ос Галина Саранпавылт блэгыт, Паял Ягрим павылн вәнтлысыт.

Мён омаментыл «Сделано в Пауле» Евгения Вьюткина Саранпавылт блнэ мащтыр-колн ялантымён, тыт супыт ос сәвсыр пормасыт ёнтуңкве ханищтахтымён. Мән ань мөт нәт ёт ләгыл маснут ёнтэв. Мәнавн тыт сака пұмыщ, хуньт-та нас кәсалан пәс мащтырыг вәрыглым пормасыт ань мәнки вәруңкве ханищтахтэв. Ос ётыл, вәим, элаль тотуңкве патыянув.

– Нән оман ёт тыт блнән сыс пыгын хотыют

ёт блы? Ойканыл нәнки блнэ кол бньщегын-а?

– Тыт ёнсхатнэмён сыс мән пыгум Леонидн ос әтямн ўраве. Ойкамёнтыл ам щәнягум-әшагум колт олымён. Мёнки ань ущты эрнэ нәпакыт атымён ос сосса махум субсидия-олн винэ мағыс очередин вос тўлавемён тах. Ань мёнки кол ўнттын щирыл номсымён, кол ўнттын янас мә лөмт бньщимён.

Пыгмён нйврам ўрнэ колн тотыглан мағыс очередин бс хасхатсумён, таквсы порат мивёв тах, тамле вәрмәльт щәнь-әщит хоса ат ўрхатэгыт. Агияныл-пыганыл местал мивет ос тәнки рупитаңкве та патэгыт.

Мән, газетат рупитан махум, Любовь ос Леонид Албиныг, Костя пыгён мәнлат щәмья ялың хоталыл янытлыянув! Пус кәт, пус ләгыл тәнанылн, номтыт бщнэ вәрмәляныл ёмас тәлаг вос ёмтэгыт!

Тамара МЕРОВА

www.khanty-yasang.ru

Өлнэ мав янытлаңкве ханищтэв

Советский үст «Яңк пуңкуп лүпта» мавн ныврамыт үргалан колн ялантан агиришит-пыгришит сосса махум пёс йис вәрмалит урыл потырт्यानүв, өлнэ мав янытлаңкве ханищтыянүв. Тамле рүпата мавн «Сюм номт» нампа региональный программа хосыт вәрөв.

Яныгпөль этпос 14-15 щислат 6-7 тал яныт агиришит-пыгришит эт «Уринэква хөтал» янытласүв. Тавн ты таквсы школан ханищтах-туңкве тах минэгыт.

Ныврамыт яныг колнакын вөв-санүв, пуссын уласын үнттысанүв. Тувыл савквилтап нётнэ суге суй-туңкве та патыс. Ёрнколт аращ палтыглахты (пөслым аращ), ос навн нелмыт поргёгыт, йиквёгыт. Аращ ватат анёква апыгрище эт үнлөг.

Анёкватэ юнсахты, апыгрище тав пөхет ёнги, порги ос китыглахты:

– Анёква, навн хотыл ёхтыс?

Анёкватэ ювле лави:

– Навн султумыл олы. Навн тал ёрнколт хумус олэв. Хунь навн тэг, рёг тоты, ёрнколув исылтытэ, тэнут пайтуңкве нёты, тав этэ блуңкве манавн ёмас. Навн ман колувт вус олы, таве үргалаңкве, янытлаңкве эри.

Апыгрище оста китыглахты:

– Анёква, түйт хотыл ёхтыс?

– Манв яңк түйтсамыл ёхтыс. Түйтсамыт ёл-патыглэгыт, макев яңк лэптал лап-лэпияныл. Тэлы лүимат сака сав түйт паты ос түйг, хунь малтыпыг ёмты, толы. Ос яныг вит ваври, я ватанув амаравет.



Апыгрище китылахты:

– Ос хунь түйя пора ёхты, түйт толуңкве паты, савсыр үйришит ёхтэгыт?

Анёкватэ лави:

– Соль, соль, ман лүимавн товлыңуйт түйя тотэгыт. Ос манхурип товлыңуй түйя тоты, вавглын? Ат ке вавглын, ныврамыт наңын вус нётэгыт.

Ныврамыт пуссын аквёт лавёгыт: «Уринэква түйя тыг тоты».

Тыт Уринэква ёхтыгпас, нётнэ йикв йиквуңкве патыс. Тувыл лави:

– Варх-Варх, паша олэн, ёмас ныврамыт! Ам нан палтын такем хоса йисум. Такем пөльвёсум, лүй вөт тақыщ вөтыс, анум тыг ат тартыстэ. Сунсэгум, нан анум урыслын, такем сав пити ваврсын. Манхурип пити ёмаснувөг олы – эрың тыя, эрың тыя. Тавн пуссын ёмасыт, ам тыг та олмыгтэгум.



Анёква лави:

– Ман ныврамыт эт наңын сака урыслүв, анв мөйтыт, стихыт, эргыт хунтлэн.

Агиришит, пыгришит Л. Лонгортов хансум стихыт ловиньтасыт. «Здоровячки» группан ялантан ныврамыт «Исум Щай» Юван Шесталов хансум стихе эргыг эргысыт. Ты стих маньщи латңыл тавн Дарья Ивановна Белован ханищтавёсыт.

Элаль ныврамыт Уринэква эт ёнгысыт, йиквсыт. Ос Уринэква лавыс:

– Пёс тагыл сосса махум акв ёмас тэла ваврёгыт – түйя порат халыйивн нётнэ төрлөмт нэгсалэгыт, халыйив сыстамыг олы. Төрлөмт хунь нэгсалэгын, ёмас урыл номсэв. Төнт номтанув эрнэ, ёмас ваврмалиг ёмтэгыт.

Ныврамаквет халыйив пөхын та ёхтыгпасыт, Уринэква эт төрлөмтыт нэгсаласыт ос танкирот ёмас ваврмалит урыл номсысыт.

Ты юи-палт ныврамыт савсыр ёнгилыл ёнгалтавёсыт. Уринэква лавыс:

– Хунь ялпың хөтал ёхты, мүй-лупса мүйлуптаңкв эри. Ам касың ныврамын атың калащит тотсум. Навн ос хөтал нупыл эруптан щирыл, ёмас щирыл олэн. Төрүм эт, Отыр эт, олэн! Пус кат, пус лагыл олэн!

Дарья АМЕНТЬЕВА



Мāхумыт мāгыс суссылтапыт вāрēгыт

Россия янытыл мощцаг хультум ос сāvнугеб ѓлнэ мирыт ѓлэгыт. Няврам ѓщнэ колыт, ишколат, институтыт, рупатат, щар кос хѓт элумхѓласыт мѓт хурипат. Мир сāv ѓлы, таимāгыс Россия янытыл ты тāл мāхумыт акван-юрщхатнэ тāлыг лāваве. Та кастыл Россият ѓлнэ мирыт вāйхатым мāгыс сāvсыр ѓмас тэлат акваг вāрыглавет.

Ханты-Мансийск ѓст аква тамле вāрмаль ѓлыглас. Руц лātңыл «Форум национального единства» намтвес, тѓнт сāv мāхумыт сāvсыр мāныл мāн ѓсувн ѓхталасыт. Тот аква нэ ѓт кāsалахтасум, потыртасум, ань элалы хансэгум.

Якутия мāt мощцаг хультум лүимā мирыт ос сāvнугеб мирыт ѓлэгыт. Тамле лүимā мирыт: эвенки, эвены, долганы, чукчи, юкагиры ос мѓт мāхум. Та мāt сāvнугеб якут хѓтпат ѓлэгыт.

Тувыл мощцаг хультум лүимā мирыт лātңыл ханищтан ос культура элалы тотнэ мāгыс ѓмщакв нэтавет. Ты мирыт тāнки пѓс ѓйс вāрмалыныл ѓргалым ѓньщаныл. Щāнь лātңыл потыртэгыт, пѓс щирыл ѓнсхатэгыт, сāлы ѓргалым, хул алыщлым, вѓраим ѓлэгыт.

Якутск ѓст «Дом дружбы народов» намаим кол рупиты. Тав потрыт, стихыт хаснэ якут ѓйка А.Е. Кулаковский намыл намаявес. Ты кол 14 тāл рупиты, тув няврамыт, мāнылат хѓтпат ос яныгхѓтпат ялантэгыт. Тот тāн

ййкващлэгыт, эргашлэгыт. Та колн Якутск ѓст ѓлнэ мāхумыт ѓхталэгыт, суссылтапыт сунсэгыт. Тувыл тāн ос ялпың хѓталыт вāрегыт, тот ѓлнэ мирыт тāнки вāрмалыныл, маснутаныл, эргыт суссылтэгыт.

Күщаиг Антонида Николаевна Корякина ѓлы. Тав Якутия мāt яныг ѓмас капаит вāрум хѓтпаг лāваве. Такви эвенк нэ, Чокурдах пāвылт яныгмас, та пāвыл Индигирка я вātат ѓнлы. Та мāнь пāвлын сака хоса эри минуңкв, мāхумыт товлыңхāпыл яласэгыт, тувыл билетыт тыныңыт.

Антонида Николаевна Якутск ѓст Якутский государственный университетыт ханищтахтыс. Тувыл ос Санкт-Петербур



А.Н. Корякина

бург ѓст Северо-Западный академия государственной служба нампа ханищтахтын кол āстлыс.

Антонида Николаевна Корякина, такви рупататэ урыл тох лāвыс:

– «Дом дружбы народов» нампа колт 37 мāхумыт акван-атыглахтын вāрмаль ѓлы, тув мāхумыт ялантэгыт. Тувыл 27 пūмаш ййквнэ, эргын коллективыт ѓлэгыт. Тув сāvсыр мир хѓтпат ѓхталэгыт, халанылт юрщхатым ѓлэгыт. Ман ѓс грант-проект щирыл рупитэв. Ты колт 52 элумхѓлас

рупиты, мāн колув яныг, хурум накпа лүлит кол.

Ты кол мāхумыт сасса мāныл янытлан, эруптан мāгыс сāvсыр ѓмас тэлат вāрēгыт. Тāн кит манос хурум щѓс тāл палыт лусытан пыгыт палт ялантэгыт. Ты тāл Дальний Востокрын Хабаровск ѓсн, Владивосток ѓсн ялсыт. Тот ййквсыт ос нѓтмил вāрсыт.

Ты урыл Антонида Николаевна тох потыртас:

– Мāн лусытан пыгыт палт акваг ялантэв. Лусытан пыгыт мāгыс тāл сис хурум щѓс суссылтапыт вāрыглэв. Тот мāн якут пыгыт ѓт кāsалахтэв, вāйхатэв. Тувыл ань хѓнтлан хум хѓтпат, пыгыт ѓт кāsалахтэв. Тāн мāгсыланыл ййкващлэв, ѓргалан мāгыс ѓнтым пормасыт мүйлуптэв.



«Дом дружбы народов» кол, Якутск ѓс

Ишкыптың мāt вим хури

Галина ДУНАЕВА

<p>Лүимә сәрипос (Северная заря) № 10 (1364), 28.05.2026</p> <p>Соучредители Дума, Правительство ХМАО – Югры</p> <p>Издатель Департамент внутренней политики ХМАО – Югры</p>	<p>Редакция ВРИО главного редактора - Рагимова Н.В. Телефон (3467) 33-17-52 (д 502)</p> <p>Заместитель гл.редактора – Кондина Г.Р. Телефон (3467) 33-17-52 (д 501)</p> <p>Ответственный секретарь – Ромбандеева С.М. Телефон (3467) 33-17-52 (д 507)</p>	<p>Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52 (д 510)</p> <p>E-mail: gazeta@khanty-yasang.ru Газета размещена на сайте www.khanty-yasang.ru</p> <p>Отпечатано: ООО «Печатный Мир» г. Сургут», ул. Маяковского, д. 14.</p>	<p>Индексы 04399, 54399 Тираж 1710 экз. Заказ 1324</p> <p>Цена свободная Мнение авторов публикаций не обязательно отражает точку зрения редакции.</p> <p>Газета зарегистрирована Управлением Федеральной</p>	<p>службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО.</p> <p>Свидетельство о регистрации ПИ №ТУ 72-00795 от 23 января 2013 г.</p> <p style="text-align: right;">12+</p>
--	---	---	---	--